

程



青崖集

提要

謹案青崖集五卷元魏初撰初字太初號青崖宏州順聖人從祖璠金末官翰林修撰以伉直稱元世祖徵至和林甚見禮重璠無子以初為後少辟中書省掾史告歸有薦於朝者帝問知璠子即授國史院編修尋拜監察御史官至南臺御史中丞事蹟具元史本傳



青崖集提要



焦竑經籍志載魏初青崖集十卷文淵閣書目亦載魏太初青崖集集一部七冊是明初原集尚存其後乃漸就亡佚今從永樂大典所載詩文搜輯裒綴釐為五卷猶可見其崖畧史稱初好讀書尤長於春秋為文簡而有法而集中所記自稱與姜或同辱遺山先生教誨又稱先生入燕初朝夕奉杖屨是其學本出元好問具有淵源故所作皆格律堅蒼

不失先民軌範又其在世祖時始以經進讀旋歷諫職遇事敢言開國規模多所裨益集中奏議一門皆詳識歲月分條臚列中如請定法令請肅朝儀元史皆採入本傳中其他若請緩椿配鹽貨請禁刁蹬客米請優護儒戶請旌鄭江死節請修孟子廟請和顧工匠請罪河南簽軍諸議史所未載者類皆當時要務切中事情今幸遺集僅存尤足以補史



闕固不徒以文章貴矣乾隆五十年四月恭  
校上

總纂紀昀陸錫熊孫士毅  
總校陸費墀

青崖集卷一

五言古詩

奉答楊左丞詩

并序

左丞相公

公宋駙馬姓楊氏名鎮今江西行首左丞


自江西來抗不

鄙不肖以詩見示其擬古云志士多苦心觀梅

云月淡溪橋浸踈影雪深籬落見橫枝漁村云

離燈社秋影岸荻長春芽野水一雙鷺暮烟三

元魏初撰





四家維揚遺懷云夢回孤館人千里漏轉重城  
月一樓客中清明云滿眼落花隨水去無情垂  
柳共春愁秋色云涼月一江翻夜白夕陽千樹  
奪春紅和周公謹韻云村酒黃花九日後曉霜  
紅葉兩山秋登孺子亭云春樹倚簷分浦色暮  
雲含雨渡江心寄林上人云林樹有無生雨氣  
野花開落見春心似此等句皆清峻有古意前  
賢謂文章之作恒發於流離困頓憔悴無聊不

平之中今相君生長富貴不為聲色狗馬所奪  
每興懷託物乃能造此雅澹境界非其篤好而  
才品不凡者未易及之敢作古語一章奉答厚  
意

風雅日已遠朝評月露多况當紉綺貴此意竟如何左  
轄膺朝寄瘡痍仰撫摩一斑時爾見清峻湧江波好在  
都俞際賡吟舜殿歌

三月二十九日郡庠後亭燕盧啟先僉事



晨集穎江渚列席當蕙邊斯亭信顯敞翠嶺帶澄川潮  
駕宜城步山積司空原青松紛被徑紅桃競發園衆賓  
起為壽繁音出嬌絃中觴念遠離歲行已再遷漂萍有  
時合浮雲未見旋今朝不為樂來會知何年

安慶郡庠後亭燕董僉事

鯨鯢起淮服郡邑盡燒殘茲城獨完好使者一開顏省  
風降文囿弭節遵曲千雙池夾行徑累榭在雲間天遠  
羣峰出地迥滄江還霞生射蛟室雁沒逢龍山開樽華

堂上命酌潁危闌主人送瑤爵但云嘉會難豈為杯酒  
驩樂此罷民安魄淵無恒彩清川有急瀾明晨起驂服  
相望阻重關

王仲思所藏幸蜀圖

小李將  
軍畫

曩予按川蜀此道凡九過仰高如梯登遇下若井墮崎  
嶇百嶮中平步得幾個朝來拂橫披恍若有今我因思  
開元初四海樂恬妥米帛三四錢萬里絕戍邏華清歌  
舞時已構此坎珂不獨君王家人生械亦巨將軍豈無



心可以銘諸座

匏瓜詩序并

禹卿趙君別墅築亭曰匏瓜諸公咸有歌詠初  
不揆以淵明戶庭無塵雜虛室有餘閑作十詩  
以道其閑適之意在風俗奔競中獨能操守如  
此其亦可尚矣

出城十里餘小小築園圍牆顏補青山月冷杵秋黍蕭  
然無人來風葉擁庭戶

志意若不足文章官有程何如田畝間脫落塵土星時  
時有佳客爛醉秋風庭

此書不可廢此酒不可無醒時自漉酒醉後還枕書人  
生天地間窮達竟如何

人皆有樂地百偽奪其真朝趨富兒屋莫隨肥馬塵不  
知竟何得空負百年身

青雲半知己遐邈非寡合持身自有道許與不可雜君  
看誰卜隣慎獨有懸榻



青唐集卷一  
非無功名心樂此樵與漁炎涼各以時知力誰能渝蕭  
然一亭上心境還清虛

只今終南山亦自有少室捷徑以索價茲心素所疾一  
飽無餘事優游保清吉

匏瓜聖所喻繫著亦何有時行與時止豈復論奇偶聊  
以名茲亭拍塞貯春酒

築亭瞰平野四望情意舒青山入座來尊俎雜肴蔬雖  
無九鼎侈此樂亦有餘

以君邁往氣未必能久閑唯其不自售所以行之艱作  
詩固可工亦可厲癡頑

楊庸齋移竹二首

子雲築新居瀟灑過日月一官笑鄭虔忍為塵埃沒歸  
來謝俗轂山影動簷樾看此渭川秋萬古幽興發  
青青河畔柳旋插旋成陰天天溪上桃蓓蕾開紅金誰  
能愛吾竹過眼從蕭森涼風歲云莫乃見高人心

閒居襟詠五首



家貧人事稀蕭索坐茅屋雖無舟楫心詩書敢私淑  
高卧北窓下清風響梧竹

聖道豈遠人其源由灑掃惟彼賢達人樂以不知老  
喟然嘗自陽立身苦不早

朱墨生涯拙青銅勲業羞三山鳳伏月萬里鷹搏秋  
時拂塵卷造物何悠悠

人生百年內憂虞何時歇不如棄塵事讀書古松樾  
偉哉聖賢心秋波湛明月

傷彼蕙蘭花不結君王池秋露有肅然落日空山  
陂良無呈瑞姿虛名將奚為

為廉公迪壽

矯矯廉泉水有子令公迪讀書達事體意遠文且質  
余茲何幸焉得與共憲職但願君侯心敬慎恒若一

諸葛武侯

漢運固已厄臣心無偏安出師非倖功為國將勝殘  
所當盡者分不可期者天至今原上草慘慘縈愁烟



七言古詩

畎畝謠為馬丈師易壽

君不見阿衡畎畝一餓鬼孰謂乃有堯之心以身許毫  
即自任從容一理無升沈又不見陶家松石草堂月萬  
古笑傲穀輝發即今有人誰似之介山處士心如雪怡  
情抱蒿萊教子付塾說一家唐舜民肯事張儀舌先生  
于茲一何少先生於茲又何拙世間碌碌不足數賴有  
天徒與吾語茫茫四海少顏色會堂下筆生風雨

為樸散提刑壽

精神滿腹眼如漆落筆蛟虬大如尺君侯累世公卿家  
清議到君能事畢憶昨臺中初見時虎頭金節含春姿  
陪從評議得梗槩磊磊落落青松枝相期不得長相與  
沂隴秋烟漢成雨今年駐馬鳳凰泉定教有此清燈語  
便當載酒三百壺對君城南梅花株為君上壽為君舞  
醉倒不用春風扶

趙公泉



趙公智者流樂水性其天居人慕公義以公名公泉巉  
纔石齒作細穿引渠厨屋清涓涓西螿東鋪各有用門  
前半溉桑麻田微雨乍添春蕩漾輕風細感秋淪連行  
潦之水無根源豈能逝者如斯川泉石之娛君實賢我  
意愛君或不然東甫妖氛今未已要君倒卷黃河湔

趙樊川

四十瑰坐未出門樊川佳處來傳聞就中韋杜稱第一  
贊皇趙公今主人主人本是風雲客幹旋造化工彌綸

西南雨漏不可塞以手補之天為新慨然拂覺長安塵  
移家要與黃溪隣霜葉烟花秋復春十年人仰樊川君  
鶴書一夕復徵辟玉案圭峰澹空碧巾車迢迢入燕國  
前日所聞今始識相逢重索城南詩才薄空慚少陵筆  
送王敬之御史耿伯玉臺掾東歸

敬之方平尚質直伯玉謨謀加綴密中臺二妙卓有聲  
驄馬西來能事畢繡衣東望五雲深盧龍烟草金溝水  
欲知別後憶君時萬疊秦山秋雨裏



題趙明叔未央瓦硯

淒淒古月土花碧  
溜雨秋簷照螢濕  
龍拏虎搏二千年  
火烈風摧見枯質  
鉛香蝕盡星蕭蕭  
又逐幽人入潛室  
繁華百閱無好心  
淨函秋波墨如漆  
神工巧護有所持  
主人鄭重董狐筆

書聽琴賦卷後

寥休愛君如愛弟  
為君賦此盡琴意  
寥休既作汗漫遊  
今君亦從此而逝  
嗚呼天地誰知音  
明月高山與流水

鳳翔城南得京都家書

鳳翔城南山路迷  
鳳翔城東人來稀  
黃塵鞍馬偶相及  
乃是史子京都歸  
蒼忙問訊語未已  
手出平安遺我思  
開絨一讀為再讀  
咫尺慈顏不遠違  
忽忽二月長安道  
南北馳心似秋草  
女孫解語學念詩  
應道在家貧亦好  
雜言送劉樂二公

君看冀北馬逸足  
一展無九州黃金  
絡頭亦不惡要與  
八駿追真遊君看  
萬里鵠六翮搏清  
秋安能只作梁上



燕銜泥附熱空啁啾吾家劉兄誰與儔濟物不減商川  
舟吾家樂弟師前秋慷慨已識元龍樓酒酣氣張吐奇  
焰霹靂墮地騰蛟蚪世間俗事不著眼况復筆墨鑄頑  
鯁南風吹雲動高興拏舟吸翠灤江頭江頭去天才三  
尺傾肝露膽皆公侯乃知君家富貴本易取落落不必  
工雕鏤我窮閉門秋水隈買田無力耕無牛牆根草色  
上階綠雨中破屋枝撐幽不獨人嗟我亦嗟直以不愧  
消百憂因君作別一大笑始信寓說未易齊鵬鳩

杭州大雪

至元二十有一年十二月七日杭州大雪之明  
日偕中丞楊子裕治書侍御史張夢符自湧金  
門登舟謁林和靖祠過太一宮凭欄四望吳山  
諸峯瓊樓玉樹上下一色日光皎然不敢正視  
長時在烟雨空濛中忽覩此晴霽亦奇觀也夢  
符走筆賦長語數韻初不揆度牽強奉次  
寸腸不用多蟠結千計百思徒屑屑春風昨夜到梅花



况是西河好晴雪。平時走馬入燕雲。不憶扁舟落江浙。  
人生南北亦偶然。造物何嘗管調燮。竹梢松滴玉零星。  
一樣林逋詩。苦列神仙官府小。洞天琴鶴正為我輩設。  
酒酣擊鞞回中流。江山逸興悠然發。自憐青鬢已如絲。  
只有丹心猶似鐵。

利州值雪次周張卿韵

至元丁丑冬分覈東川趨中臺。二妙霍與張適與會遇。  
成同途朝行長林夜守更語話。情切忘崎嶇。偶然雪嶺

滑復滑。驛騎凡劣不可驅。一日凡五墜。五墜之外猶可  
探驪珠。黃泥滿身不足笑。大笑駭僕汝墜汝復來。吾扶  
相看大咤復相語。誰遣不守君家株。我時酒熟氣已張。  
乃謂此亦何足成。嗟吁與君更約明年行。共看夔州八  
陣圖。

題歸潛洞

巔崖鑿透苔花碧。遶磔風來竹香濕。龍頭蛻骨蟄不飛。  
老殼中枵含古質。橫林六月秋生衣。垂簾冬夜春浮筆。



主人夢覺邯鄲來，乍得幽深快胃臆。君不見玉關將軍  
冰雪肌，廟堂謨臣安危機。一發不中羣口譏，昨日把笏  
今扶犁。誰知趙侯鬢未衰，中流勇退世所推。却愁此志  
不終遂，再使騰踏今昌期。

送趙大中從李五祖奉祀嶽瀆

男兒兀坐近四十，骨弱心痿徒補輯。遠床百匝呼少陵，  
安得秋風生羽翼。吾家趙弟本不凡，鬢禿張眼如漆。  
江海方期汗漫遊，一夕飛絨御香濕。天臺真人馬子微，

愛君能詩重君筆。太華峰頭日觀西，萬壑風烟入呼吸。  
歸來落紙中書堂，頓覺吾輩生輝光。青雲從此一萬丈，  
回首俗物都茫茫。

登朝天嶺

余來漢中凡三年，大山小山行欲遍。今年復有東川行，  
大底勢隨崗阜轉。石頭犖确顛且危，不獨心驚夢亦戰。  
利州城北到朝天，又是川行山一變。懸崖鉅澁留苔青，  
石罅陰森鬱松蔭。得語數語疑有神，得酒百杯亦不倦。



青崖集卷一  
三  
回環應接奇無窮乃見平時所未見落落參軍正紫髯  
行行御史真鐵面相看大醉復長歌滅沒春鴻天一線

適安堂

窮通有定分流坎無庸悲湘纍自苦亦太隘韓子孤憤  
將奚為人生百年渾幾鼠窺鬼瞰徒成私何如樊川一  
樽酒往者莫究今已而秦川如畫渭如絲韋曲杜曲無  
敵詩高堂駕空竹樹裏觚稜瀟洒含幽姿起居飲食頗  
自適不矯不飾隨所施舉手為謝昌黎師乃今平原能

得之有時高咏歸來辭有時獨酌芙蓉卮人間所得容  
力取委之順之夫何思

韓監察所藏畫馬

房星降精雲晦明天機滅沒麒麟行逸群絕足豈易得  
側身佇目長風生憶昔天王走八極不惜千金買奇骨  
浮雲追電逸邈至千里瑤池才一蹴漢家沙苑唐虎臣  
隊色滿山雲景新只今雄駿竟寂寞轉益愁向駕駘群  
吁嗟冀北亦古國安得天驥曾不聞駕轅伏櫪計必有



王良伯樂誰其人韓卿好古得此圖索遍烏臺好詩客  
侵晨打門驚夢覺開卷金石聲嘖嘖雨中破屋百不遂  
才薄何以塞君責此圖一日當飛去看避青驄洛陽陌

游玉泉

少時嘗讀子虛賦愛其胸中雲夢淮湘鄂越歷歷生風  
雨我思古人何悠悠遂欲大放心顏揮斥八極鞭九州  
誰其捉我坐屋底壯心不死庸有幾玉泉一覲凡五年  
風水咫尺如千里孫劉受厚有嘉招溫詩歷落亦奇士

郃侯俊秀甫遠來騏驥不慚駕與齒借驢肩酒穿村行  
雲烟草樹來尋盟初盤山腰探龍窟空明鴻洞玻瓈青  
買魚醜酒放船入鼇頭掀舞蛟人泣鼓楫敲舷凌浩蕩  
巖崖倒影屏風濕君能為我傾倒雙白瓶我亦為君拚  
醉一吸復一吸沈竿續蔓不可測黑綠陰深五千尺杳  
然心悸身生芒泊岸為著靈運屐攀緣古栢上層巔細  
路蜿蜒遠鱣脊萬古風從鳥道來夕陽天影凝空碧解  
衣小憇足力生西南更覓丹邱迹人生天地逆旅間貴



無等倫惟有間功名既不麒麟閣箕頰自合相追攀折  
腰摧眉必不已役役沒沒誰爾憐我知此里有定論所  
遇所窮或者天東山歌酒乃大起夜郎醉月終其年古  
賢出處各有以安吾見在清樽前

觀象詩

此舊作也至元十八年見之于并門張巨源家因錄之

皇帝馬箠開雲南始得一象來中國中國傳聞未嘗見  
一日爭覩轟霹靂巨鼻引地六七尺左卷右舒為口役  
耳項垂垂倍數牛皮毛蒼蒼艾緞黑目豎青熒鏡有光

背闊隱嶙山之脊卷髮胡奴鐵作鈎要將驅使驚九州  
吾聞國家方寶賢異物自至非所求誰能更上旅葵篇  
清風萬古追西周

五言律詩

送劉祥卿之上都

筆硯相從日于今四十年關山長契闊尊酒暫留連汾  
水秋風裏灤江霽雪邊故人如見問為說已華顛

送張夢符



青崖集卷一  
磊落衣冠舊詩書照眼青禮闈今妙選憲府昔才名漢  
水三千夢錢塘十里亭殷勤一杯酒江海望澄清

送葉亦愚

向在諸生列孤危斥老姦今逢太平日咫尺拜天顏盡  
已都俞際無心用舍間錢塘八九月秋色滿吳山

挽呂丈子謙

憶昔京都日青山拜上庠只今江海外白髮見諸郎行  
業誰先後功名竟渺茫無從酌秋草三復白雲章

褒城即席送何侍郎

話別京都後音書隨渺茫相逢漢臯上鞍馬又匆忙我  
淚狄仁傑君評許子將殷勤一杯酒此去重相望

送某學士

魯齋天下士高第數君侯立學心恒足居官行益修早  
苗方渴雨健翮正橫秋尊酒何年夜陳登百尺樓

送楊子裕叅政赴江西省

世契前朝舊臺聯此日同才謀知緩急肝膽見清忠江



海風烟裏瘡痍照燠中太平十二策正要沃宸聰

夢弟妹有感

弟妹飄零久羹牆念慮間相逢應有日比老合投閒夢  
逐雞散斷心隨馬影還清明寒食近烟雨萬重山

順聖溫泉留題

并序

戊申歲初年十有七從先大父玉峯靖肅公來  
拜祀先壠曾浴於此今初獨來父祖俱棄世犬  
馬亦已四十嗟歲月之易得懷先人而詠嘆邱

山零落堂構多慚因留數字以紀歲月

破塚風霜裏諸孫骯髒邊龜趺埋老蘚翁仲卧荒烟宗  
邑嗟誰起文源愧我傳一杯清酌底聊與慰重泉

為唐佐弟壽

兄弟惟君我相看半白頭邇來方聚首今又問行舟風  
雨山意夜雞豚石澗秋此期須有日燈火讀書樓

七言律詩

次雷苦齋韵二首

并序



年前五月與行臺姜公別於太原之三郊爾後  
初留滯居延者凡八月今始還司苦齋憲副以  
遊金山寺二詩見示因次其韻復寄姜公行臺  
鞍馬黃塵已強顏更堪白髮鏡中看曾陪尊俎回春煖  
正想音書慰客寒勝覽足供詩筆健相思今覺帶圍寬  
長江一碧橫千里無復秋風細有瀾

三士陪從契分深每高談議豁塵襟十年脚有隨車雨  
一片心無從木金晴雪梅花曾漢上白雲秋水又分陰

黑河沙土揚州月別後相思直到今

次男必復韻

心頭何事最相關一片飛雲萬疊山去驛隔年才得信  
分司六月不知還身歸造物垂除裏意在經營慘澹間  
為報金蘭何侍御別來今已斑毛斑

奉次明叔趙君見寄詩韻

嘗擬騷人作問天賢愚誰後復誰前塵冠一拂豈徒爾  
霜簡千里要凜然自許已知吾計拙並驅那敢子爭先



南風雁足詩來好歸思遙生秋草邊

次重雲雋公韵

山中月影共婆娑發興題詩墨自磨空負有言如鄭直  
未能遽止似商訛本來搏擊風稜少此去歸休意思多  
且喜居延凡兩月與君時一到無何

壽御史中丞

丞相勲名紀太常君侯忠鯁復騰光青宮意注文貞笏  
白簡風生肅政堂守道自當成豹變擊強初不待鷹揚

黑頭事業磨崖頌要共生平日月長

白塔遇表兄劉君

并序

至元七年吾兄劉公之官謙州爾後初亦從事  
川陝治漢中漢中去謙州不知其幾千里也用  
是音信隔絕吾兄又遭際變亂艱險百至乃棄  
家業繫妻子奔竄南來初未之知也十有七年  
初奉命有事鞏昌因赴京都道出保定白塔驛  
與吾兄相遇不覺驚喜如對夢寐吾兄雖精神



不衰而鬚髮已半白矣乃舉觴相勞苦吾兄  
因謂初言余幾死者數矣在患難中每南望  
屈指數吾兄弟輩如隔兩世將謂不復得會聚  
矣今見吾弟可勝喜哉但牧之弟尚在淮上不  
知當幾何時得相見也因泣數行初亦款款  
歎念者久之且誦向贈別吾兄詩云少日驅  
馳四海心中年憂樂輒相尋為不誣矣復白  
兄曰吾兄不愛死艱苦萬里盡忠本朝為聖天  
子見知此苦尚在功名富貴恐迫吾兄耳別離  
愁苦之思當埽去乃舉酒上壽作五十六字以  
侑觴云

蜀道山尖上似天  
謙和雪片大如綿  
兵塵鴻洞七千里  
音信消沈十一年  
馬上相逢有今日  
鏡中驚歎各華顛  
幾時收拾田園了  
風雨燈窓共醉眠

拜詔

五更朝馬簇金溝  
共待雞人報曉傳  
萬國衣冠有今日



青崖集卷一  
九天堂闕照神州紫泥書帶爐香折赤羽旗隨日影流  
一片高呼春色裏戴盆何幸望宸旒

拜詔次尚書劉公韵

龍旆霓旌夾兩階九重閭闔一時開千官花底瞻天拜  
雙鳳雲間捧詔來生意根芽如啟蟄歡聲朝野似聞雷  
小臣蟻蝨渾無補願酌春江酌壽杯

通明閣

千尺觚稜北斗橫一川煙樹冷雲平瀛洲方丈知何在

渭水終南畫不成天上碧桃青鳳啄月邊瑤草白龍耕  
自憐未斷人間夢赤日黃塵六月行

子陽李兄與余家交三世矣故於初頗相愛念子  
陽才疎意廣不屑細務且知時命未偶因放浪於  
詩酒泉石之間嘗自趙抵淇由洛陽登華山至長  
安而還得詩文二十餘篇皆名公投贈之什也至  
元十一年初以事來鎮陽得遂披讀敬書五十六  
字以發揮吾子陽襟期之梗槩云



不是孤高不愛官只緣行路古來難一杯徑醉從人笑  
萬事無吾著眼看安得暫離塵夢裏放教卧卧冷雲端  
此心此話誰能會邂逅青燈幾夜闌

贈答商臺符

玉削青尖太華山君家名勝百年間相公開府今分陝  
吾子成家又鑄顏詩似晚江晴浪捲心如春水白鷗閑  
自憐南北成何事粗向交情見一斑

奉贈虛極劉仙翁

聞說秦州地上仙心無一物思飄然雲山想像俱成畫  
杖履追隨惜未緣引鶴看花秋徑裏枕書聽語夜窓前  
回頭塵土三千丈何處人間有洞天

次韵答左丞揚中齋

每驚塵慮頓成空曾接君侯玉塵風青眼相看文字裏  
丹心都在簡書中一時人物誰輕重千古譏評幾異同  
明日洪都憲司去不能無意失諸公

子裕參政已還中  
省公又成車北上

青霞觀



花枝歌曲竹勾連中有青眉地上仙清露和香殊旖旎  
晚風吹鶴更踟躕只知畫裏今無筆誰信人間別有天  
叫斷青鸞飛不到黃塵一隔路三千

得男必復書

來時暑雨拍車頭到日冬烟壓草樓酒為瘴來須強飲  
書因家遠屢輕投計回蜀道一千里遍走秦川七九州  
咫尺還司敢停脚西南又入劍門秋

挽孟待制駕之

有志明時竟不伸士林公議惜斯人秋風斷雁從誰託  
老木清霜見本真草草杯盤千里別悠悠天地一邱塵  
題詩忘却傷心處為是傳家有鳳麟

讀汪氏義武忠烈二碑

并序

宣慰公初聞之久矣今年夏公枉過余于長安  
客舍不獲款曲為恨未幾初以事至翠昌將謂  
得奉承言論以償夙昔願見之心也不數日公  
復以事詣涼州胸中鬱鬱未遂快愜因讀義武



忠烈二碑作五十六字書以留之以為後日與  
公相會之資云

矯矯風神義與忠堂堂父子隴西公孤城抗節前朝事  
萬死開邊此日功上國賢藩俱倚重諸孫此志獨稱雄  
兩碑讀罷登高望落日祠堂滿樹風

送梁貢父

少日騫騰鷹脫鞲  
荆秋色上吳鉤  
五年直到天低處  
萬里生還海盡頭  
尊酒相逢有今日  
惡懷無復論窮愁

此行敷奏蠻荒了  
合近天家五鳳樓

挽陳叅鄉季淵

文源浩汗接元麻  
詩律新奇自一家  
人物百年誰鶚表  
秋風孤劍幾龍沙  
膝橫坡老猷門杖  
頭戴淵明漉酒紗  
恨煞歸來纔幾日  
白楊原上鬧啼鴉

挽殷僉事獻臣

曾扈龍旗北斗傍  
遠持使節到扶桑  
性情邃密希前宋  
詩筆淋漓近晚唐  
方倚細陳青淚疏  
不期便日白雲鄉



傷心千里燕南路落日鴉啼墮樹蒼

次前韵贈雷苦齋侍御

倚遍江湖寺寺樓却乘西馬到西州心如老栢千年雪  
節似蒼崖萬仞秋公議自當歸宿望時評且莫嘆遲留  
萱堂強健兒知學底是君侯可用愁

送程侍御鉅夫

一封丹詔九天來御史青驄翰苑才廊廟久勞思稷契  
邱園初不望鄒枚定知天下無雙士正在君侯此一迴

自昔楚才為晉用中原麟鳳莫深猜

青宮賜教化叅政海青

瀚海東邊百尺崖崖頭霜鷗直齧雲開紅香曉動千官合  
綠漲春圍萬馬來俊氣共知為異物老拳真見不凡材  
當時寵錫非無意已有光輝極上臺

賜蒙固岱平章海青

海東青鷲氣凌空錦臂條籠下九重春水纔溶千頃綠  
頭鴉已落半天風須知神物不易得自是聖皇酬有功



丞相黑頭誰與比此心正要答宸衷

張提刑向尹大興天子以二海青寵錫之未幾拜

茲命則知睿眷之有在也於其行作詩以勉之

龍旗簇仗暖生烟鷲搏空控老拳萬里風頭飛雪急千  
官影裏得春偏也知顰笑非徒爾始信澄清不偶然為  
報山雞莫回首雄心長在碧雲邊

吾鄉之崖有以青得名者余嘗取以自號至元十

四年偕御史國瑞外郎周卿有東州之行道出閭

州閭之南二十餘里佛閣突兀因周覽形勝得河  
南人王子京青崖石刻不知閭之崖與吾鄉之崖  
一而二者耶抑海內一家山川脈絡同一元氣二  
而一者耶或其偶與之合耶乃書此以識

遙遙閣道倚空青湛湛澄江練影橫千佛參差半天上  
四山環合一川平雲間煙火無閒地畫裏昇平有此行  
鄉閣三年六千里偶於仙苑見崖名

留別憲府諸公



五年驄馬顏和厚一日天恩愧不任  
共道相從有知己定交何必到分金  
兩行清淚三年別一片白雲千里心  
珍重鳳凰城下客明朝走馬蜀山深

寄商左山

并序

清明後數日陪姚雪齋張鄰野雅集於匏瓜亭  
偶得五十六字奉呈左山相公千里一笑


麗澤門西十里亭記從別後幾清明  
梯航遐國歸籌畫柱石中朝望老成  
滿眼青山連夜夢一尊明月兩鄉情

花時更向東臯醉腸斷雲間百二城



青崖集卷一

青崖集卷一





三

